

МЕСЯЦА ОКТЯБРЯ В 6-Й ДЕНЬ
СВЯТАГО СВЯЩЕННОИСПОВЕДНИКА МИХАИЛА СОЮЗОВА,
ПРЕСВИТЕРА

Зри: Поется последование святого священноисповедника Михаила вкупе с последованием святого апостола Фомы.

НА ВЕЛИЦЕЙ ВЕЧЕРНИ

Блажен муж: 1-й антифон. На Господи, возвах: стихиры апостола Фомы 5 и священноисповедника Михаила 3.

Стихиры священноисповедника, глас 1.

Подобен: Небесных чинов:

Приидите, вернии, светло почтим/ честнаго пресвитера града святого Петра/ и юных наставника мудраго,/ изряднаго ревнителя благочестия/ и веры Православныя поборника,// Михаила, исповедника Христова.

На Единого Бога уповая,/ Богомудре Михаиле,/ не убоялся еси гонителей безбожных,/ хотящих погубити Церковь Христову,/ на судищи неправеднем кроток и незлобив пребыл еси// и веру правую твердо исповедал еси.

Страдания за Христа верою восприял еси,/ священномучеником Вениамином наставляем/ и ради Церкви Святыя себе не пощадил еси,/ утешением от Бога укрепляем,/ темже радости о Господе// и жизни вечныя сподобился еси.

Слава, апостола Фомы, глас 6: Яко слуга слова: И ныне, Богородичен: Кто Тебе не ублажит:

Вход. Прокимен дне. И чтения три апостола Фомы. На стиховне стихиры апостола Фомы.

По Трисвятом тропарь апостола Фомы. Слава, тропарь священноисповедника Михаила. И ныне, Богородичен: Вся паче смысла:

Тропарь священноисповедника, глас 2:

Воспоим, людие, священноисповедника Михаила,/ Кронштадтскому праведнику сослужителя искренняго/ и святителю Вениамину сострадальца вернаго,/ в житии своем Богу и ближнему ревностно послужившаго/ и на судищи беззаконнем веру правую небоязненно исповедавашаго.// Того молитвами, Христе Боже, спаси души наша.

НА УТРЕНИ

На Бог Господь: тропарь апостола Фомы, дважды. Слава, тропарь священноисповедника Михаила. И ныне, Богородичен: Вся паче смысла:

По стихословиях и по полиелеи седальны апостола Фомы. Прокимен, Евангелие и стихира апостола Фомы.

Канон Богородицы, со ирмосом на 4, апостола Фомы на 6 и священноисповедника Михаила на 4. Катавасия: Отверзу уста моя:

Канон священноисповедника, глас 1.

Песнь 1

*Ирмос: Господеви поим победную песнь,/ во исходе Израилеве из Египта/
Чермного моря и Иордана струи огустившему,/ Единому преславно,/ людям,
пешешествующим посреде его,// славно бо прославися.*

Господи Боже наш, помози нам грешным воспети по достоянию угодника Твоего священноисповедника Михаила, егоже Ты изволил еси во святых дивно прославить.

В малем селении Жерновицы от благочестиваго корене плод благокрасен прозябл еси отроча благонравное, князю Муромскому тезоименитое: в тебе бо Христос Бог дивно прославися.

В вертоградех духовных земли Новоградския закону Божию прилежно поучался еси, блаженне, послежде в духовнем цветнице града святого Петра православно богословити добре навикл еси, Бога в Троице прославляя.

Богородичен: Ужасошася страхом, Всецарице, Ангельская чинопочаля, хваляще Тя: поет же благодати ради всяк ум, яко Матерь Зиждителя: похвалы бо всякия превозшла еси чин, Христа рождши.

Песнь 3

Ирмос: Прежде зачатия честнаго Самуила несумненно Богу обещавши,/ священномати Анна ныне, радующися, поет с нами:// утвердися в Господе сердце мое.

Служение Церкви Христове добре начиная, святче Божий, пастырю Кронштадтскому сослужитель искренний явился еси, вопия: утвердися в Господе сердце мое.

В храме духоносных апостолов священства дар достойно восприяв, отче Михаиле, изшел еси на пастырское делание, вопия: утвердися в Господе сердце мое.

Отроком, воинскому искусству навыкающим, пастырь добрый и учитель благочестия, Богомудре Михаиле, был еси, поучая тех на Бога все упование возлагати и в Нем Едином утверждать сердце свое.

Богородичен: Зачатие безсеменно Чистая, и Рождество нетленно: Бог бо бе яве рождется, человеческого естества падение призывая. Темже Богородицу Тя истинную и сущую воспеваем.

Кондак священноисповедника, глас 5:

Любовию и милосердием душу свою украсив,/ паству твою призывал еси благотворити терпящим глад и нищету,/ и во исповедание веры, яко в броню крепкую одеаясь,/ пред мучители правду Божию явил еси,/ священноисповедниче отче Михаиле./ Ныне же Престолу Вседержителеву предстоя,// тепле молишися о душах наших.

Икос:

Днесь память пастыря доброго и исповедника твердаго нам возсия, укрепляющи ны в вере и благочестии: той бо душу свою по вся дни за паству полагая, святителю Вениамину соработник усердный явился, егоже на судищи неправеднем от клеветы и злоречия мужественне защищая, Христа небоязненно исповеда. Таже осуждение незаконное и темничное заключение, страдания и

болезнь кротко претерпев, в Небесныя кровы възиде, идеже ныне Престолу Вседержителю предстоит, тепле молится о душах наших.

Седален апостола Фомы, глас 8: Мрежею словес:

Слава, седален священноисповедника, глас 6:

Союзом любви ученицы Христовы связуеми, бессмертныя Трапезы причастницы быша, ты же священноисповедниче Михаиле, святым апостолом подражая, в годину тяжкую паству твою в любви и милосердии утверждал еси и Тайнам Христовым люди приобщал еси, во еже вражду и злобу уврачевати и мир Божий благодатию стяжати.

И ныне, Богородичен:

Упование мира, благая Богородице Дево, Твое и единое страшное предстательство просим: умилосердися на люди беспомощныя, моли милостиваго Бога, избавитися душам нашим от всякаго прещения, едина Благословенная.

Песнь 4

Ирмос: *Слыша древле Аввакум, Христе, чудный Твой слух/ и страхом взываше:/ от юга Бог приидет и Святый от горы приосененныя чащи/ спасти помазанныя.// Слава силе Твоей, Господи.*

Закона Божия наставник изрядный, не токмо словом, но и делом был еси, отче Михаиле, Светом Христовым сердца и умы учеников просвещая и вопия: слава силе Твоей, Господи.

Егда явися велия брань по всей земли, святе, велию любовь и дела милосердия явил еси, врачбницу воином устроая, попечение о сиротах имея и воспевая: слава силе Твоей, Господи.

Крамоле и багряноименному губительству Землю Русскую постигшим, прииде испытание веры твоея, священноисповедниче Михаиле, темже во узилищи пребывая, непрестанно взывал еси: слава силе Твоей, Господи.

Богородичен: Радуйся, иереов благоговейных одеждо и преподобных удобрение; праведных, радуйся, радости и мученик похвало; радуйся, старцев жезле и крепосте вопиющих: слава силе Твоей, Господи.

Песнь 5

Ирмос: *Уголь горящий, иже до Исаиных устен/ Серафим приложи некогда,/ клещами взем и приложен;/ он же, очищен быв,// – правде научитесь, – всем проповедаше.*

В лютую годину служение свое добре совершая, пастырю истинный Михаиле, лстивыя обычаи новых сынов Дафана отвергл еси и святителю Вениамину чадю послушное явился еси, Христа всем проповедуя.

Во дни отступления народа русскаго от веры Христовы, исповедниче, алтарь святым чудотворцем русским устроая, с упованием взывал еси: Русь Святая, храни веру Православную, в нейже тебе утверждение.

К пастве своей глаголал еси, святе: призываю убо вас, братие и сестры, подвизатися в мире и любви, кротости и смирении. И якоже Сам Господь Иисус

Христос призва нас, потщимся помощи в нищете и гладе сущим, не пощадим серебра и злата.

Богородичен: Бога како на руку носиши, рцы? И како доиши, всяческая рукою Содержащаго, о Дево Всеблаженная? – Аз, рече, чиста пребываю и по рождестве, Христа Бога рождши, Адамов долг и праматерний отъемши.

Песнь 6

Ирмос: *Яко во глубины морския отвергся/ и углебох в тимении глубины,/ от отчаяния умныя зимы,/ лениости моя, Христе, изми мя,// яко Иону от зверя.*

Ведому ти на судище беззаконное, исповедниче святой Михаиле, паства твоя на стогнах Петрова града среташе тя, во умилении сердечном со слезами моляще Христа изъяти тя из рук нечестивых, якоже Иону от зверя.

Велию милость Господь Иисус Христос яви нам страстию Своею, тако уста твоя небоязненно изрекоша, егда пред судиями неправедными, исповедниче Христов Михаиле, предстал еси.

Не убоявся прещений и лжесвидетельств мучителей, якоже древнии исповедницы, обратил еси суд на главу судивших тя, Богомудре Михаиле, святителю Вениамину сострадалече верный, Церкви Христовы поборниче.

Богородичен: Избави нас, Дево Всепетая, от напастей враг видимых и невидимых, и соблюди, Мати Божия, Православною верою воистинну Богородицу Тя исповедающих: имаши бо присно мощь, яко рождши Создавшаго всяческая.

Кондак и икос апостола Фомы.

Песнь 7

Ирмос: *Прои́доша, яко черто́г, пе́щный пла́мень нестерпи́мый/ и́же за благоче́стие иногд́а/ о́троцы святы́и, показáвшиеся я́ве,/ и, соглáсно воспева́юще, песнь поя́ху:// отце́в Бо́же, благослове́н еси́.*

Клевету от человек беззаконных и суд неправедный мужественно претерпел еси, блаженне Михаиле, и заключение темничное, яко иго благое, восприим, ликуя взывал еси: отцев Боже, благословен еси.

Разлучение с паствою твоею смиренно претерпел еси, отче Михаиле, обаче сердцем своим от присных не отдаляясь, во узилищи пребывая, молитвы за вся Господу возносил еси: отцев Боже, благословен еси.

Егда во врачебнице темничней огневицею тело твое палимо бе, священноисповедниче Михаиле, тогда душа твоя ко Христу Спасу отыде, взывая: отцев Боже, благословен еси.

Богородичен: Троице во Единстве православно служаще, Ты Мати Дево Чистая, яко Бога плотию рождшую проповедающе земнии, Божественно поем: отец наших Боже, благословен еси.

Песнь 8

Ирмос: *Чуда преестественнаго/ показа образ огнеросная печь древле,/ огонь бо не опали юныя дети,/ Христово являя безсеменное от Девы Божественное рождество./ Тем, воспевающе, воспоем:/ да благословит тварь вся Господа// и превозносит во вся веки.*

У гроба блаженныя Ксении погребено бысть тело твое, праведниче и исповедниче отче Михаиле, душою же в покой вечный возшел еси, идеже со всеми святыми поеши: да благословит тварь вся Господа и превозносит во вся веки.

Словеса премудра на тебе исполнишася, отче Михаиле: угодна бо бе Господеву душа праведника, сего ради потщася от среды лукавствия. Темже со всеми святыми ликуя, поеши: да благословит тварь вся Господа и превозносит во вся веки.

Ликует Церковь Христова и красуется град Петров, яко бо крин благовонный, от земных недр обретошася честныя мощи твоя! Сие сокровище многоценное людие благоговейно лобызающе, скорую помощь приемлют и поют: да благословит тварь вся Господа и превозносит во вся веки.

Богородичен: Ты еси спасение всех человеков, Яже Бога рождши неизреченным образом: Ты верных Спасительница, Богородице, и слепых Наставница, и падающих Исправление. Темже Тя восхваляюще Христу зовем: благословите вся дела, Господа, пойте и превозносите Его во веки.

Песнь 9

Ирмос: *Серафимски, приглашающе, вопием Ти, Богородице, вернии:/ Тобою возвеличи Господь,/ еже сотворити с нами./ Тем Тя, Чистая,/ и от Тебе неискусомужно воплощенного Спаса,// яко Бога всех, песньми величаем.*

Храм Бога Живаго был еси, священноисповедниче Михаиле, Егоже моли о нас присно, тебе чтущих и во святой храм твой притекающих, храмы Духа Святаго быти, да вси тя песньми величаем.

В годину лютую исповедник Христов твердый явился еси, ныне же Той пред Отцем Своим Небесным ты исповеда, Михаиле богоблаженне, помози и нам веру Православную соблюсти, да вси тя песньми величаем.

Троицен: Троице Святая, Боже наш, молитвами угодника Твоего священноисповедника Михаила, утверди в Православии и благочестии землю Русскую и от междоусобных брани сохрани ю, мир и любовь даруй нам, да Тя присно величаем.

Богородичен: Носиши вся Носящаго, и доиши всем пищу Дающаго, велие и страшно еже паче ума Твое таинство, Ковчеже Честныя Святыни, Дево Богородице. Темже Тя верою ублажаем.

Светильны апостола Фомы.

Слава, светилен священноисповедника:

Свет Невечерний ти возсия/ и веселие вечное яве ты прият,/ праведниче и священноисповедниче Христов Михаиле,/ темже и нас молитвами твоими/ Божественнаго просвещения сподоби,// совершающих ныне светоносную память твою.

И ныне, Богородичен:

Молебницу Ти приводим и теплую Заступницу, Пречистую Матерь Твою, вернии по долгу: сподоби рабы Твоя причаститься славы Твоея, Христе, и праведных наследия, и пищи райския и даждь Царство Небесное.

На хвалитех стихиры апостола Фомы. Славословие великое. Тропарь апостола Фомы. Слава, тропарь священноисповедника Михаила. И ныне, Богородичен: Вся паче смысла:

На часех тропарь апостола Фомы. Слава: тропарь священноисповедника Михаила, и ныне: Богородичен часа. Кондак апостола Фомы точию.

НА ЛИТУРГИИ

Блаженна от канона апостола Фомы песни 3-я и 6-я.

Прокимен, Апостол, аллилуия, Евангелие и причастен апостола Фомы.

Молитва

О пастырю богомудрый и исповедниче Христов Михаиле! Все житие твое любви к Богу и ближнему исполнено бысть, ты бо паству, вверенную ти от Господа, не токмо словом, но и делом поучал еси. Служение твое во граде святого Петра ревностно совершал еси, во дни же гонений на Церковь Русскую, надеждою на Бога укрепляем, на судищи неправеднем веру правую небоязненно исповедал еси и вратами правды во Град Небесный ко Престолу Божию возшел еси.

Сего ради (притекающе ко святым мощем твоим) заступления твоего о нас просим и усердно взываем ти: умоли Всемиловитваго Бога теплым твоим предстательством, да оградит Церковь Святую от расколов и нестроений, да сохранит землю Русскую от нашествия иноплемennых и междоусобных брани.

Отче святыи, испроси у Господа пастырем духовное трезвение и ревность о спасении пасомых, воином мужество и силу на защиту Отечества нашего, учащим разум и смиренномудрие, учащимся прилежание и благонравие, всем вся в житии благопотребная и полезная к вечному спасению.

Ей, угодниче Божий, соедини всех нас союзом веры, надежды и любви, да вкупе с тобою прославим Отца, и Сына, и Святого Духа, Единого в Троице славимаго и покланяемаго Бога, ныне и присно, и во веки веков. Аминь.